

四庫全書

集部

欽定四庫全書

集部

石倉歷代詩選卷四十六

詳校官庶吉士臣范逢恩

侍讀臣孫球覆勘

總校官進士臣朱 鈴

校對官編修臣潘曾起

謄錄監生臣蔣 輞

欽定四庫全書

石倉歷代詩選卷四十六

明 曹學佺 編

盛唐十五

元結

字次山  
瀼州人

欸乃曲

誰能聽欸乃欸乃感  
人情不恨湘波深不怨  
湘水清所嗟  
豈敢道空羨江月明  
昔聞扣斷舟引釣歌此聲始歌

悲風起歌竟愁雲生遺曲今何在逸為漁父行

貧婦詞

誰知苦貧夫家有愁怨妻請君聽其詞能不為酸悽所憐抱中兒不如山下麌空念庭前地化為人吏蹊出門望山澤回頭心復迷何時見府主長跪向之啼

西陽城

江北有大洲洲上堪力耕此中宜五穀不及西陽城城畔多野桑城中多古荒衣食可力求此外何所望

小回中

叢石橫大江人言是釣臺水石相衝激此中為小回回  
中浪不惡復在武昌郭來客去客船皆向此中泊

閔荒詩

煬皇嗣君位隋德滋昏幽日作及身禍以為長世謀居  
常恥前王不思天子遊意欲出明堂便登浮海舟令行  
山川改功與玄造侔河淮可支合峰嶺生回溝封隕下  
澤中作山防逸流艤艤狀龍鷗若負宮闕淳荒娛未央

極始到滄海頭忽見海門山思作望海樓不知新都城  
已為征戰丘吾聞古賢君其道當靜柔慈惠恐不足端  
和忘所求嗟嗟有隋氏惛惛誰與傳

春陵行

癸卯歲漫叟授道州刺史道州舊四萬餘戶經賊  
已來不滿四千大半不勝賦稅到官未五十日承  
諸使徵求符牒二百餘封皆曰失其限者罪至貶  
削於戲若悉應其命則州縣破亂刺史欲焉逃罪

若不應命又即獲罪戾必不免也吾將守官靜以  
安人待罪而已此州是喬陵故地故作喬陵行以  
達下情

軍國多所需切責在有司有司臨郡縣刑法競欲施供  
給豈不憂徵斂又可悲州小經亂亡遺人實困疲大都  
無十家大族命單羸朝餐是草根暮食仍木皮出言氣  
欲絕意速行步遲追呼尚不忍况乃鞭撻之郵亭傳急  
符來往跡相追更無寬大恩但有迫促期欲令鬻兒女

言發恐亂隨悉使索其家而又無生資聽彼道路言怨傷誰復知去冬山賊來殺奪幾無遺所願見王官撫養以惠慈奈何重驅逐不使存活為安人天子命符節我所持州縣急亂亡得罪復是誰逋緩違詔令蒙責固其宜何人采國風吾欲獻此辭

賊退示官吏有序

癸卯歲西原賊入道州焚燒殺掠幾盡而去明年賊又攻永破邵不犯此州邊鄙而退豈力能制敵

歟蓋蒙其傷憐而已諸使何為忍苦徵斂故作此一篇以示官吏

昔年逢太平山林二十年泉源在庭戶洞壑當門前井稅有常期日晏猶得眠忽然遭世變數歲親戎旃今來典斯郡山夷又紛然城小賊不屠人貧傷可憐是以隔鄰境此州獨見全使臣將王命豈不如賊焉今彼徵斂者迫之如火煎誰能絕人命以作時世賢思欲委符節引竿自刺船將家就魚麥歸老江湖邊

雪中懷孟武昌

冬來三度雪農者懼歲稔我麥根已深各得在倉廩天  
寒未能起孺子驚人寢云有山客來籃中見冬草燒紫  
為溫酒煮鱖為作藩客亦愛杯樽思君共歡飲所嗟山  
路間時節寒又甚不能苦相邀興盡還就枕

與瀼谿鄰里

昔年苦逐亂舉族來南奔日行幾十里愛君此山村峰  
谷呀回映誰家無泉源修竹多夾路扁舟皆到門瀼谿

中曲濱其陽有閒園鄰里昔贈我許之及子孫我嘗有  
匱乏鄰里能相分斯人轉貧弱力役難自存誰將瀼濱  
苦付與曲中論

招孟武昌

風霜枯萬物退谷如春時窮冬涸江海杯湖澄清漪湖  
盡到谷口單船近堦墀湖中更何好坐見大江水欹石  
為天涯半山在湖裏谷口聲潺湲絕壑流寒泉松桂蔭  
茅舍白雲生坐邊武昌縣主賢武昌人不厭退谷正可

遊杯湖任來泛湖上有水鳥見人不飛鳴谷口有山獸  
往往隨人行莫將車馬來令我鳥獸驚

招陶別駕家陽華作

海內厭兵革騷騷十二年陽華洞中人似不知亂鳥誰  
能家此地終老可自全草堂背巖洞幾峰軒戶前清渠  
匝庭堂出門仍灌田半崖盤石徑高亭臨極顛引望見  
何處迤逶隴北川杉松幾萬株蒼蒼滿前山巖高曠草  
陽飛溜何潺潺洞深迷遠近但覺多洞淵晝遊興未盡

日暮不欲眠探燭飲洞中醉昏漱寒泉始知天下心耽  
愛各有偏陶家世高逸公忍不獨然無或畢婚嫁竟為  
俗務牽

遊石谿示學者

小谿在城下形勝堪賞愛尤宜春水滿水石更殊怪長  
山勢迴合井邑相繫帶石林繞舜祠西南正相對階庭  
無爭訟郊境罷守衛時時谿上來勸引辭學輩今誰不  
務武儒雅道將廢豈忘二三子且夕相勉勵

遊漁泉示泉上學者

顧吾漫浪久不欲有所拘每到漁泉上情性可安舒草堂在山曲澄瀾涵階除松竹蔭幽徑清源湧坐隅築塘列浦畦引流灌時蔬復在郊郭外正堪靜者居愜心則自適喜尚人或殊此中若可安不服銅虎符

漫問相里黃州

東鄰有漁父西鄰有山僧各問其性情變之俱不能公為二千石我為山海客志業豈不同今已殊名跡相里

不相顧相友且相異何況天下人而欲同其意人意苟  
不同分寸不相容漫問軒裳客何如耕釣翁

宴湖上亭作

廣亭蓋小湖湖亭實清曠軒窗幽水石怪異尤難狀石  
樽能注酒寒水宜初漲岸曲坐客稀杯桴上搖漾遠水  
入簾幕浙瀝吹酒舫欲去未回時飄飄正堪望酣興思  
共醉促樽更相向舫去若驚鳬溶瀛滿湖浪朝來暮忘  
返暮歸獨惆悵誰肯愛林泉從吾老湖上

樊上漫作

漫家郎亭下復在樊水邊去郭五六里扁舟到門前山  
竹繞茅舍庭中有寒泉西邊雙石峰引望堪忘年四鄰  
皆漁父近渚多閒田且欲學耕釣於斯求老焉

登白雲寺

出門見南山喜逐松徑行窮高欲極遠始到白雲亭長  
山繞井邑登望宜新晴洲渚曲湘水縈廻隨郡城九疑  
千萬峰嶵嶪天外青煙雲無遠近皆傍林嶺生俯視松

竹間水石何幽清涵映滿軒戶娟娟如鏡明何人病惛  
濃積醉且未醒與我一登臨為君安性情

朝陽巖下歌

朝陽巖下湘水深朝陽洞口寒泉清零陵城郭夾湘岸  
巖洞幽奇帶郡城荒蕪自古人不見零陵徒有先賢傳  
水石為娛安可羨長歌一曲留相勸

宿無為觀

九疑山深幾千里峰谷崎嶇人不到山中舊有仙老家

十里飛泉遠丹竈如今道士三四人茹芝鍊玉學輕身  
霓裳羽蓋傍臨壑飄飄似欲來雲鶴

說洄谿招退者

長松亭亭滿四山山間乳竇流清泉洄谿正在此山裏  
乳水松膏當灌田松膏乳水田肥良稻苗如蒲米粒長  
糜色如珈玉液酒酒熟猶聞松節香谿邊老翁年幾許  
長男頭白孫嫁女問言只食松田米無藥無方向人語  
活谿石下多泉源盛暑大寒冬大溫屠蘇宜在水中石

洄谿一曲自當門吾今欲作洄谿翁誰能住我舍西東  
勿憚山深與地僻羅浮尚有葛仙翁

石魚湖上醉歌

石魚湖似洞庭夏水欲滿君山青山為樽水為沼酒徒  
歷歷坐洲島長風連日作大浪使人不能運酒舫我持  
長瓢坐巴丘酌飲四坐以散愁

石宮四詠

石宮春雲白白雲宜蒼苔拂雲踐石徑俗士誰能來

石宮夏水寒寒水宜高林遠風吹蘿蔓野客熙清陰  
石宮秋氣清清氣宜山谷落葉逐霜風幽人愛松竹  
石宮冬日煖煖日宜溫泉晨光靜水霧逸者猶安眠

欸乃曲三首

偶存名跡在人間順俗安時到處閒來謁大官兼問政  
扁舟却入九疑山

湘江二月春水平滿月和風宜夜行唱橈欲過平陽戍  
守吏相呼問姓名

千里楓林煙雨深無朝無暮有猿吟停橈靜聽曲中意  
好似雲山韶濩音

蕭穎士

字茂挺  
鄱陽人

重陽陪元魯山登北城贈別

山縣遶古堞悠悠快登望雨餘秋天高目盡無隱狀綿  
連潢川迥杳渺鴟路深彭澤興不淺臨風動歸心賴茲  
琴堂暇傲睨傾菊酒人知歲已登從政復何有遠山十  
里碧一道銜長雲青霞半落日混合疑晴曉漸聞驚栖

羽坐歎清夜月中輒愴有違行子念明發僅能泯寵辱  
未免傷離別江湖不可忘風雨勞相思明時當盛才短  
伎安所設何日謝百里從君漢之澨

仰答韋司業垂訪

呦呦食萍鹿常飲清泠川但悅豐草美寧知牢饌鮮主  
人有幽意將以充林泉羅網幸免傷蒙君復羈牽高堂  
列衆賓廣座鳴清絃俯仰轉驚惕徘徊獨憂煎緬懷雲  
巖路欲往無由緣物各有所好違之傷自然

晉代有儒臣當年富詞藻立言寄青史將以贊王道遼  
落緬歲時辛勤歷江島且言風波倦探涉豈為寶不遇  
庚征西云誰展慄抱士貧乏知已安得成所好

答鄒象先

桂枝常共擢茅茨冀同薦一命何阻修載馳各川縣壯  
圖悲歲月明代恥貧賤回首無津梁祇令二毛變

蒙山作

東蒙鎮海沂合沓餘百里清秋淨氛靄崖崿隱天地于

役勞往還息徒暫攀騎將窮絕迹處偶得冥心理雲氣  
雜虹霓松聲亂風水微明綠林際杳寥丹洞裏仙鳥時  
可聞羽人邈難視此焉多深邃賢達昔所秘子尚捐俗  
紛季隨蹕避軌蘊真道彌曠懷古情未已白鹿凡幾遊  
黃精復奚似顧子尚牽纏家業重書史少學務從師壯  
年貴趨仕方馳桂林譽未暇桃源美歲暮期再尋幽哉  
羨門子

送張翬下第歸江東

俱飛仍失路綵服邇清波地積東南美朝遺甲乙科客  
愁千里別春色五湖多明日舊山去其如相望何

越江秋曙

扁舟東路遠曉月下江瀆瀛灔信潮上蒼茫孤嶼分林  
聲寒動葉水氣曙連雲暎日浪中出榜歌天際聞伯鸞  
常去國安道惜離羣延首剡谿近詠言懷數君

山莊月夜作

獻書嗟棄置疲拙歸田園且事計然策將符公冶言桑

榆清暮景雞犬應遙村  
贊罷里閭晏麥秋田野喧澗聲  
連枕簟峰勢入堦軒未奏東山妓先傾北海樽  
隴瓜香早熟庭果落初繁更愜野人意農談朝竟昏

李華字遐叔

趙郡人

詠史

漢皇修雅樂乘輿臨太學三老與五更天皇親割牲一  
人調風俗萬國和且平單于驟欵塞武庫欲銷兵文物  
此朝盛君臣何穆清至今墳壇下如有簫韶聲

巢許在嵩賴陶唐不得臣九州尚洗耳一命安能親縣  
邈數千祀丘中誰隱淪朝遊公卿府夕是山林人蒲帛  
揚側陋薜蘿為縉紳九重念入夢三事思降神且設庭  
中燎寧窺泉下鱗

日照崑崙上羽人披羽衣乘龍駕雲霧欲往心無違此  
山在西北乃是神仙國靈氣皆自然求之不可得何為  
漢武帝精思徧羣山糜費巨萬計宮車終不還蒼蒼茂  
陵樹足以戒人間

文侯耽鄭衛一聽一忘餐白雪燕姬舞朱絰趙女彈淫  
聲流不返惄蕩日無端獻歲受朝時鳴鐘譙百官兩牀  
陳管磬九奏殊未闌對此惟恐卧更能整衣冠

寄趙七侍御并序

自餘平谿行經弋陽至上饒山川幽麗思與雲卿  
同遊邈不可得因叙疇年之素寄懷於篇云

搖櫓曠江流江清山復重心愜賞未足川迴失前峰凌  
灘出極浦曠若天地通君陽青嵯峨開坼混元中九潭

魚龍窟仙成羽人宮陰與潛鬼物精光動煙空玄猿啼  
深龍白鳥戲葱蒙飛湍鳴金石激溜鼓雷風雨濯萬木  
鮮霞照千山濃草間長餘綠花靜落幽紅渚煙見晨釣  
山月間夜春覆谿窈窕波涵石淘溶溶丹丘忽聚散素  
璧相奔衝白日破昏靄靈山出其東勢排昊蒼上氣壓  
吳越雄迴頭望雲卿不得相追從遇勝悲獨遊貪奇相  
欣逢禽尚彼何人胡為束樊籠吾師度門教授弁躡遐  
蹤

仙遊寺

舍事入樵徑雲木深谷口萬壑移晦明千峰轉前後巍然龍潭上石勢若奔走開坼秋天光崩騰夏雷吼靈谿自茲去紆直互紛糾聽聲靜復喧望色無更有冥冥翠微下高殿映杉柳滴滴洞穴中懸泉響相扣昔時秦王女羽化年代久日暮松風來簫聲生左右早窺神仙錄願結芝术友安得羨門方青囊擊吾肘

春遊吟

初春遍芳甸千里藹盈矚美人摘新英步步玩春綠所  
思杳何處宛在吳江曲可憐不得共芳菲日暮歸來淚

滿衣

長門怨

弱體鴛鴦薦啼妝翡翠衾鴉鳴秋殿曉人靜禁門深每  
憶椒房寵那堪永巷陰自驚羅帶緩非復舊來心

奉使朔方贈郭都護

絕塞臨光祿孤營佐貳師鐵衣三月冷金鼓朔風悲都

護徵兵日將軍破虜時揚鞭玉闕道回首望旌旗

春行寄興

宜陽城下草萋萋澗水東流復向西芳樹無人花自落  
春山一路鳥空啼

嚴武

字季膺中書侍郎挺之之子

題巴州光福寺楠木

楚江長流對楚寺楠木幽生赤崖背臨谿掉石盤老根  
苔色青蒼山雨痕高枝闊葉鳥不度半掩白雲朝興暮

香殿蕭條轉密陰花龕滴瀝垂清露聞道偏多越水頭  
煙生霧斂使人愁月明忽憶湘水夜猿叫還思鄂渚秋  
看君幽靄幾千丈寂寥窮山今遇賞亦知鐘梵報黃昏  
猶卧禪牀戀奇響

寄杜拾遺錦江野亭

漫向江頭把釣竿懶眠沙草愛風湍莫倚善題鸚鵡賦  
何須不着鷄冠腹中書籍幽時曠時後醫方靜處看  
興發會能馳駿馬應須直到使君灘

巴嶺答杜二見憶

臥向巴山落月時，兩鄉千里夢相思。  
可但步兵偏愛酒，也知光祿最能詩。  
江頭赤葉楓愁客，籬外黃花菊對誰。  
跋馬望君非一度，冷猿秋雁不勝悲。

班婕妤

賤妾如桃李，君王若歲時。  
秋風一已勁，搖落不勝悲。  
寂寥苔滿沈，沈綠草滋繁。  
華非昔日指，輦竟何辭。

軍城早秋

昨夜秋風入漢關  
朔雲邊月滿西山  
更催飛將追騎虜  
莫遣沙場匹馬還

奚賈

常建同  
時人

嚴陵灘下寄常建

日入溪水靜尋真  
此亦難乃知滄洲人  
道成仍釣竿漾  
檝乘微月振衣生早寒  
紛吾成獨往自速耽考槃已息  
漢陰誚且同濠上觀曠然心無涯  
誰問容膝安

謁李尊師

萬物返常性惟道貴自然先生容其微隱凡為列仙鍊  
魄閉瓊戶養毛飛洞天將知道遙久得道無歲年

尋許山人亭子

桃源若遠近漁子棹輕舟川路行難盡人家到漸幽山  
禽拂席起溪水入庭流君是何年隱如今成白頭

李康成

江南行

楊柳青青鶯欲啼風光搖蕩綠蘋齊金陵城頭日色低

日色低情難極水中鳧鷺雙比翼

采蓮曲

采蓮去月沒春江曙翠鉢紅袖水中央青荷蓮子雜衣  
香雲起風生歸路長歸路長那得久各迴船兩搖手

玉華仙子歌

紫陽仙子名玉華珠盤承露餌丹砂轉態凝情五雲裏  
嬌顏千歲芙蓉花紫陽綵女矜無數遙見玉華皆掩嫭  
高堂初日不成妍洛渚流風徒自憐璇堦霓綺閣碧題

霜羅幕仙娥桂樹長自春王母桃花未嘗落上元夫人  
寶上清深宮寂歷厭層城解佩空憐鄭交甫吹簫不逐  
許飛瓊溶溶紫庭步渺渺瀛臺路蘭陵貴士謝相逢濟  
北書生尚回顧滄洲傲吏受金丹清心迴望雲之端羽  
蓋霓裳一相識傳情寫念長無極長無極永相隨攀霄  
歷金闕弄影下瑤池夕宿紫府雲母帳朝餐玄圃崑崙  
芝不學蘭香中道絕却教青鳥報相思

自君之出矣

自君之出矣絃吹絕無聲思君如百草撩亂逐春生

張巡

蒲州人

聞笛

砦堯試一臨虜騎附城陰不辨風塵色安知天地心營  
開邊月近戰苦陣雲深旦夕更樓上遠聞橫笛音

守睢陽作

接戰春來苦孤城日漸危合圍侔月晕分守若魚麗屢  
厭黃塵起時將白羽揮裏瘡猶出陣飲血更登陴忠信

應難敵堅貞諒不移無人報天子心計欲何施

顏真卿

字清臣  
瑤琊人

謝陸處士杼山折青桂花見寄之什

羣子遊杼山山寒桂花白綠荑含素萼采折自逋客忽  
枉巖中詩芳香潤金石全高南越蠹豈謝東堂策會愜  
名山期從君恣幽覲

贈僧皎然

秋意西山多別岑縈左次繕亭歷三癸安趾鄰什寺元

化隱靈蹤始君啓高致誅榛養翹楚鞭草理芳穂俯砌  
披水容逼天掃峰翠境新耳目換物遠風塵異倚石忘  
世情援雲得真意嘉禾幸勿剪禪侶欣可庇衛法大臣  
過佐游羣英萃龍池護清澈虎節到深邃徒想棟頂期  
于今沒遺記

使過瑤臺寺有懷圓寂上人

真卿昔以天寶元年尉醴泉亟過瑤臺寺圓寂上  
人院秩滿遷監察御史巡覆諸陵而上人已去此

寺大歷十三年春二月以刑部尚書謁拜昭陵慨然有懷其詞曰

上人居此寺不出三十年萬法元無著一心惟趣禪忽  
紓塵外軫遠訪區中緣及爾不復見支提猶岌然

登平望橋下作

登橋試長望望極與天平際海薰葭色終朝鳬雁聲近  
山猶髡鬢遠水忽微明更覺諸公作知高題柱名

刻清遠道士詩因而繼作

不到東山寺於今五十春  
竭來從舊賞林壑宛相親  
吳子多藏日秦王厭勝辰  
劍池穿萬仞盤石坐千人  
金氣騰為虎琴臺化若神  
登壇仰生一捨宅歎珣珉  
中嶺分雙樹廻巒絕四鄰  
窺臨江海接崇飾四時新  
客有神仙者於茲雅麗陳  
名高清遠峽文聚斗牛津  
跡異心寧間聲同質豈均  
悠然千載後知我揖光塵

張謂

字正言河南人

讀後漢逸人傳

龐公南郡人家在襄陽里何處偏來往襄陽東陂是誓  
將業田種終得保妻子何言二千石乃欲勸吾仕鶴鵠  
巢茂林龜鼈穴深水萬物從所從吾心亦如此不見鹿  
門山朝朝白雲起採藥復採樵優游終暮齒

同孫構免官後登薊樓

昔在五陵時年少心亦壯常矜有奇骨必是封侯相東  
走到營州投身事邊將一朝去鄉國十載履亭障部曲  
皆武夫功成不相讓猶希虜塵動更取林胡帳去年大

將軍急負樂生謗北別傷士卒南遷死炎瘴薄落悲無  
成行登薊丘上長安三千里日夕西南望寒沙榆塞沒  
秋水灣河濱策馬從此辭雲山保閒放

代北州老翁答

負薪老翁往北州北望鄉關生客愁自言老生有三子  
兩人已向黃沙死如今小兒新長成明年聞道又徵兵  
定知此別必零落不及相隨同死生盡將田宅借鄰戶  
且復伶俜去鄉土在生本求多子孫及有誰知更辛苦

近傳天子尊武臣  
強兵直欲靜胡塵  
安邊自合有長策  
何必流離中國人

湖上對酒行

夜坐不厭湖上月  
晝行不厭湖上山  
眼前一樽又長滿  
心中萬事如等閒  
主人有黍百餘石  
濁醪數斗應不惜  
即今相對不盡歡  
別後相思復何益  
茱萸灣頭歸路賒  
願君且宿黃公家  
風光若此人不醉  
參差辜負東園花

贈喬林

去年上策不見收今年寄食仍淹留羨君有酒能使醉  
羨君無錢能不憂如今五侯不愛客羨君不問五侯宅  
如今七貴方自尊羨君不過七貴門丈夫會應有知己  
世上悠悠何足論

邵陵作

嘗聞虞帝苦憂人祇為蒼生不為身已道一朝辭北闕  
何須五月更南巡昔時文武皆銷鑠今日精靈常寂寞  
班竹年來筍自生白蘋春盡花空落遙望零陵見舊丘

蒼梧雲起至今愁惟餘帝子千行淚添作瀟湘萬里流

寄崔澧州

共禊臺郎被俱褰郡守帷罰金殊往日鳴玉幸同時五  
馬來何晚雙魚贈已遲江頭望鄉月無夜不相思

送裴侍御歸上都

楚地勞行役秦城罷鼓鼙舟移洞庭岸路出武陵谿江  
月隨人影山花趁馬蹄離魂將別夢先已到闕西

送青龍一公

事佛輕金印，勤王度玉闌。  
不知從樹下，還肯到人間。  
楚水青蓮淨，吳門白日閒。  
聖朝須助理，絕莫愛東山。

送韋侍御赴上都

天朝辟書下，風憲取才難。  
更謁麒麟殿，重簪獬豸冠。  
月明湘水夜，霜重桂林寒。  
別後頭堪白，時時鏡裏看。

錢田尚書還兗州

忠義三朝許威名，四海聞更乘歸魯詔。  
猶憶破胡勲別路，逢霜雨行營對雪雲。  
明朝郭門外，長揖大將軍。

送杜侍御赴上都

避馬臺中貴登車嶺外遙還因貢賦禮來謁大明朝地入商山路鄉連渭水橋承恩返南越樽酒重相邀

道林寺送莫侍御

何處堪留客香林隔翠微薜蘿通驛騎山竹挂朝衣霜引臺烏集風驚塔雁飛飲茶勝飲酒聊以送將歸

別睢陽故人

少小客遊梁依然似故鄉城池經戰陣人物限存亡夏

雨桑條綠秋風麥穗黃有書無寄處相送一沾裳

郡南亭子宴

亭子春城外朱門向綠林柳枝經雨重松色帶烟深漣  
酒迎山客穿池集水禽白雲常在眼聊足慰人心

早春陪崔中丞浣花谿宴得暄字

旌節臨谿口寒郊斗覺暄紅亭移酒席畫鷁逗江村雲  
帶歌聲颶風飄舞袖翻花間催秉燭川上欲黃昏

燕鄭伯璵宅

正月風光好，逢君上客稀。  
曉風催馬轉，春雪帶花飛。  
堂上吹金管，庭前試舞衣。  
俸錢供酒債，行子未須歸。

夜同宴用人字

北斗回新歲，東園值早春。  
竹風能醒酒，花月解留人。  
邑宰陶元亮，山家鄭子真。  
平生頗同道，相見日相親。

過從弟制疑官竹齋

羨爾方為吏，衙門獨宴如。  
野猿偷紙筆，山鳥汚圖書。  
竹裏藏公事，花間隱使車。  
不妨垂釣坐，時膾小江魚。

揚州雨中張十七宅觀妓

夜色帶寒煙，燈花拂更燃。  
殘妝添石黛，豔舞落金鉢。  
掩笑須歌扇，迎歌乍動絃。  
不知巫峽雨，何事海西邊。

登金陵臨江驛樓

古戍依重險，高樓見五梁。  
山根盤驛道，河水浸城牆。  
庭樹巢鸚鵡，園花隱麝香。  
忽然江浦上，憶作捕魚郎。

同王徵君湘中有懷

八月洞庭秋，瀟湘水北流。  
還家萬里夢，為客五更愁。

用開書帙偏宜上酒樓故人京洛滿何日復同遊

官舍早梅

堦下雙梅樹春來畫不成晚時花未落陰處葉難生摘  
子防人到攀枝畏鳥驚風光先占得桃李莫相輕

王清公主挽詞

學鳳年猶小乘龍日尚賒初封千戶邑忽駕五雲車地  
接金人岸山通玉女家秋風何太早吹落禁園花

別韋郎中

星輶計日赴岷峨，雲樹連天阻。笑歌南入洞庭隨，雁去西過巫峽。聽猿多崢嶸，洲上飛黃蝶。灔澦堆邊起白波，不醉郎中桑落酒。教人無奈別離何。

送皇甫齡宰交河

將軍帳下來從容，小邑彈琴不易逢。樓上胡笳傳別怨，樽中臘酒為誰濃。行人醉出雙門道，少婦愁看七里峰。今日相如輕武騎，多應朝暮客臨邛。

杜侍御送貢物戲贈

銅柱朱崖道路難伏波橫海舊登壇越人自貢珊瑚樹  
漢使何勞獬豸冠疲馬山中愁日晚孤舟江上畏春寒  
由來此貨稱難得多恐君王不忍看

春園家宴

南園春色正相宜大婦同行少婦隨竹裏登樓人不見  
花間覓路鳥先知櫻桃解結垂簷子楊柳能低入戶枝  
山簡醉來歌一曲參差笑殺郢中兒

西亭子言懷

數叢芳草在堂陰幾處閒花映竹林攀樹立猿呼郡吏  
傍谿白鳥應家禽青山看景知高下流水聞聲覺淺深  
官屬不令知禮數時時緩步一相尋

送僧

童子學修道誦經求出家手持貝多葉心念優曇花得  
度北州近隨緣東路賒一身求清淨百毳納袈裟鍾嶺  
更飛錫爐峰期結跏深心大海水廣願恒河沙北去不  
堪別彼行安可涯殷勤結香火來世上牛車

同諸公遊雲公禪寺

共許尋難足誰能惜馬蹄長空淨雲雨斜日半虹霓簷  
下千峯轉窓前萬木低看花尋徑宵聽鳥入林迷地與  
喧聞隔人將物我齊不知樵客意何事武陵谿

哭護國上人

昔喜三身淨今悲萬劫長不應歸北斗應是向西方舍  
利衆生得袈裟弟子將鼠行殘藥椀蟲網舊繩牀別起  
千花塔空留一草堂支公何處在神理竟茫茫

送盧舉使河源

故人行役向邊州  
匹馬今朝不少留  
長路闊山何日盡  
滿堂絲竹為君愁

題長安壁主人

世人結交須黃金  
黃金不多交不深  
縱令然諾暫相許  
終是悠悠行路心

長沙失火後戲題蓮花寺

金園寶刹半長沙  
燒劫旁延一萬家  
樓殿總隨煙燄去

火中何處出蓮花

早梅

一樹寒梅白玉條  
迥臨村路傍谿橋  
不知近水花先發  
疑是經春雪未消

劉方平 河南人

代宛轉歌二首

星參差明月二八燈  
五枝黃鶴瑤琴將別去  
芙蓉羽帳惜空垂  
歌宛轉宛轉恨無窮  
願為潮與浪俱起碧流中

曉將盡黃姑織女銀河盡九華錦衾無復情千金寶鏡  
誰能引歌宛轉宛轉傷別離願作楊與柳同向玉容垂

烏栖曲二首

蛾眉曼臉傾城國鳴環動佩新相識銀漢斜臨白玉堂  
芙蓉行障掩燈光

畫舸雙艤錦為纜芙蓉花發蓮葉暗門前月色映橫塘  
感郎中夜度瀟湘

巫山高

楚國巫山秀清猿日夜啼萬重春樹合十二碧峰齊峽  
出朝雲下江來暮雨西陽臺歸路直不畏向家迷

梅花落

新歲芳梅樹繁花四面同春風吹漸落一夜幾枝空少  
婦今如此長城恨不窮莫將遼海雪來比後庭中

銅雀妓

遺令奉君王嚙蛾強一妝歲移陵樹色恩在舞衣香玉  
座生秋氣銅臺下夕陽淚痕沾井幹舞袖為誰長

寄嚴八判官

洛陽新月動秋砧  
瀚海沙場天半陰  
出塞能全方叔策  
安親更策老萊心  
漢家宮裏風雲曉  
羌笛聲中雨雪深  
懷袖未傳三歲字  
相思空作隴頭吟

秋夜寄皇甫冉鄭豐

洛陽清夜白雲歸  
城裏長河列宿稀  
秋後見飛千里雁  
月中聞搗萬家衣  
長憐西雍青門道  
久別東吳黃鵠磯  
借問客書何所寄  
愁心不啻雨鄉違

寄隴右嚴判官

副相西征重蒼生屬望辰還同周薄伐不取漢和親虜  
陣推枯易王師決勝頻高旗臨鼓角太白靜風塵赤狄  
爭歸化青羌已請臣遙傳闇外美威選幕中賓玉劍光  
初發冰壺色自真忠貞期報主章服宜榮身邊草含風  
綠征鴻過月新胡笳長出塞隴水半歸秦絕漠多來往  
連年厭苦辛路經西漢雪家擲後園春誰念煙雲裏深  
居汝顧濱一叢黃菊地九日白衣人松葉疎開嶺桃花

密映津纏書若有寄為訪許由鄰

春怨

朝日殘鶯伴妾啼閒簾只見草萋萋  
庭前時有東風入楊柳千條盡向西

送別

華庭靄色滿今朝雲裏檣竿去轉遙莫怪山前深復淺  
清淮一日雨迴潮

夜月

更深月色半人家，北斗闌干南斗斜。  
今夜偏知春氣暖，蟲聲新透綠窓紗。

蔣潤人

義興

古意

冉冉紅羅帳，開君玉樓上。  
畫作同心鳥，銜花兩相向。  
春風正可憐，吹映綠窗前。  
妾意空相感，君心何處邊。

臺中書懷

持憲當休明，飭躬免顛沛。  
直繩備豪右，正色清冠蓋。  
寄

切才恨薄職雄班匪大坐居三獨中立在百僚外簡牘時休暇依然秋興多披書惟骨鯁循跡少間和庭樹凌霜柏池傾萎露荷歲寒應可見感此遂成歌

山行見鵲巢

鵲巢性本高更在西山木朝下清泉戲夜近明月宿非直避網羅兼能免傾覆豈憂五陵子挾彈來相逐

巫山之陽香谿之陰明妃神女舊跡存焉

神女歸巫峽明妃入漢宮擣衣餘石在薦枕舊臺空行

雨有時度谿流何日窮至今詞賦裏悽愴寫遺風

南谿別業

結宇依青嶂開軒對綠疇樹交花兩色谿合水同流竹  
徑春來掃蘭樽夜不收逍遙自得意鼓腹醉中遊

蔣漁

義興人

途次維揚望京口寄白下諸公

北望情何限南行路轉深晚帆低荻葉寒日下楓林雲  
白蘭陵渚煙青建業岑江天秋向盡無處不傷心

登栖靈寺塔

三休尋磴道九折步雲霓瀝澗臨江北郊原極海西沙  
平仄步出樹遠綠楊低南指晴天外青峰是會稽

王季友

河南人

雜詩

采山仍采隱在山不在深持斧事遠遊固非匠者心翳  
翳青桐枝樵爨日所侵斧聲出巖壑四聽無知音豈為  
鼎下薪當復堂上琴鳳鳥久不栖且與枳棘林

滑中贈崔高士瓘

夫子保藥命外身得无咎日月不能老化腸為筋否十  
年前見君甲子過我壽于今何相逢華髮在我後近而  
知其遠少見今白首遙信蓬萊宮不死世世有玄石采  
盈擔神方秘其肘問家惟指雲愛氣常言酒攝生固如  
此履道當不朽未能太玄同願亦天地久實腹以芝术  
賤形仍芻狗自勉將勉余良藥在苦口

寄韋子春秘書

出山秘芸署山木已再春食我山中藥不憶山中人山  
中誰余密白髮日相親雀鼠晝夜無知我厨廩貧有情  
盡捐棄土石為周身依依舍北松不厭我南鄰夫子質  
千尋天澤枝葉新余以不材壽非智免斧斤

還山留別長安知己

出山不見家還山見家在山路是門前此去長樵采青  
谿誰招隱白髮自相待惟餘澗底松依依色不改

別李季友

樓鳥不戀枝喈喈有同聲行子馳出戶依依主人情昔時霜臺鏡醜婦羞爾形閉匣二十年皎潔猶常明今日照離別長途白髮生

代賀若今譽贈沈千運

相逢問姓名亦存別時無子今有孫山上雙松長不改百家惟有三家村村南村西車馬道一宿通舟水浩浩澗中磊磊十里石河上淤泥種桑麥平坡塚墓皆我親滿田主人是舊客舉聲酸鼻問同年十人七人歸下泉

分手如何更此地回頭不語淚潸然

酬李十六岐

鍊丹文武火未成賣藥販履俱逃名出谷迷行洛陽道  
乘流醉臥滑臺城城下故人久離怨一歡適我兩人願  
朝飲杖懸沽酒錢幕餐囊有松花飯子何車馬日憧憧  
李膺門館爭登龍千賓揖對若流水五經發難如叩鐘  
下筆新詩行滿壁立談古人坐在席間我草堂有臥雲  
知我山儲無擔石自耕自刈食為天如鹿如麋飲野泉

亦知世上公卿貴且養丘中草木年

宿東谿李十五山亭

上山下山入山谷谿中落日留我宿  
松石依依當主人不在意亦足名  
花出地兩重階絕頂平天一小齋  
本意由來是山水何用相逢語舊懷

觀于舍人壁畫山水

野人宿在人家少朝見此山謂山曉半壁仍棲嶺上雲  
開簾欲放湖中鳥獨坐長松是阿誰再三招手起來遲

于公大笑向予說小弟丹青能爾為

玉壺冰

玉壺知素結止水復中澄堅白能虛受清寒得自凝分  
形同曉鏡照物掩宵燈壁映圓光入人驚爽氣凌金罍  
何足貴瑤席幾回升正值求珪瓊提攜共飲冰

楊浚

題武臨草堂

草堂列仙樓上在青山頂戶外窺數峰堦前對雙井雨

來花盡濕風度松初冷登棧行不疲入谿語彌靜云能  
去塵服無欲事金鼎正直心所存謗諛長自省適知幽  
遁趣已覺煩慮屏更愛雲林間吾將臥南潁

廣武懷古

河水城下流登城望彌懷海雲飛不斷峯草綠相接龍  
門無舊塲武牢有遺堞扼喉兵易守捫指計何捷天奪  
項氏謀卒成漢家業鄉山遙可見西顧淚盈睫

贈李郎中

仙郎早朝退直省臥南軒院竹自成賞庭階寂不喧焚  
香開後閣起草闈前門禮樂風流美光華星位尊榮兼  
朱紱貴交乃布衣存是日登龍客無忘君子恩

宋昱

天寶十二年以中書舍人知選事

曉次荆江

孤舟大江水水涉無昏曙雨暗迷津時雲生望鄉處漁  
翁聞自樂樵客紛多慮秋色湖上山歸心日邊樹徒稱  
竹箭美未得楓林趣向夕垂釣還吾從落潮去

題石窟寺

梵宇開金地香龕鑿鐵圍影中羣象動空裏衆靈飛簷  
牖籠朱旭房廊挹翠微瑞蓮生佛步瑤樹挂天衣邀福  
功雖在興王代久非誰知雲朔外更覩化胡歸

寇坦

開元  
中人

同皇甫兵曹天官寺浴室新成招友人賞會

溫室歡初就蘭交托勝因共聽無漏法兼潤有為塵水  
潔三空性香沾四大身清心多善友頌德慰同人

同張少府和庫狄員外夏晚初霽南省寓直時  
兼充節度判官之作

黃綬歸休日仙郎復奏餘宴居當夏晚寓直會晴初露  
散星文發雲披水鏡虛高才推獨唱嘉會喜連茹月色  
搖春闌香煙靄暝廬千門傳夜警萬像照階除少孺嘉  
能賦文強閱賜書兼曹謀未展入幕志方擴為奉靈臺  
帛恭先待漏車貞標不可仰空此樂樵漁

沈東美

天寶十二年除  
膳部員外郎

春和苑舍人宿直省翫新池寄南省友

傳聞閭閻裏寓直有神仙史為三墳博郎因五字遷晨  
臨翔鳳沼春注躍龍泉去似登天上來如看鏡前影搖  
宸翰發波淨列星懸既濟仍懷友流讌欲進賢彈冠聲  
實貴覆被渥恩偏溫室言雖阻文場契獨全玉珂光赫  
奕朱紱氣蟬聯興逸潘仁賦名高謝朓篇青雲仰不逮  
白雪和難牽冉冉胡為此甘心老歲年

畢耀

與杜甫友善

古意

璇閨繡戶斜光入千金女兒倚門立橫波美目雖後來  
羅被遙遙不相及聞道今年初避人珊瑚挂鏡長隨身  
願得侍兒為道意後堂羅帳一相親

金昌緒

餘杭人

春怨

打却黃鸝兒莫教枝上啼啼時驚鴛夢不得到遼西

楊貴

登天寶三年第

時興

貴人時未貴咸願顧寒微及自登樞要何曾問布衣平  
明登紫閣日晏下彤闈擾擾路傍子無勞歌是非

張傳

天寶至德間人

辭房相公

秋風颶颶雨霏霏愁殺恓惶一布衣辭君且作隨陽雁  
海內無家何處歸

田澄

成都為客作

蜀郡將知遠城南萬里橋衣緣鄉淚濕貌以客愁銷地  
富魚為米山芳桂是樵旅遊惟得酒今日遇明朝

韋迨

為韶州牧

早發湘潭寄杜員外院長

北風昨夜雨江上早來涼楚岫千峰翠湘潭一葉黃故  
人湖外客白首尚為郎相憶無南雁何時有報章

沈如筠

句容人

閨怨

雁盡書難寄愁多夢不成願隨孤月影流照伏波營

余延壽

江寧人

折楊柳

天道連國門東西折楊柳歲寢君不見裯嬌垂來久緣  
枝棲暝禽雄去雌獨吟餘花怨春盡微月起秋陰坐望  
窗中蝶起攀枝上葉好風吹長條婀娜何如妾妾見柳  
園新高樓四五春莫吹胡塞曲愁殺隴頭人

南州行

搖艇至南國國門連大江中洲西邊岸數步一垂楊金  
釧越縠女羅衣胡粉香織纈春卷幔采蕨暝提筐弄瑟  
嬌垂幌迎人笑下堂河塘浣衣處無數紫鴛鴦

人日剪綵

閨婦持刀坐自憐裁綵新葉催情緞色花寄手成春帖  
燕留妝戶黏難待向人擊來問夫婿何處不如真

張暉

曲阿人

題栖霞寺

躋險入幽林翠微含竹殿泉聲無休歇山色時隱見潮來雜風雨梅落成霜霰一從方外遊頓覺塵心變

詩

茫茫煙水上日暮陰雲飛孤坐正愁緒湖南誰擣衣

殷遠

句容人

塞上

萬里墮城在三邊虜氣衰沙填孤障角燒斷故關碑馬

色經寒慘雕聲帶晚悲將軍正閒暇留客換歌辭

送友人下第歸省

君此卜行日高堂應夢歸莫將和氏淚滴着老萊衣  
嶽雨連河細田禽出麥飛到家調膳後吟好送斜暉

友人山亭

故人雖薄宦往往涉清谿鑿牖對山月褰裳拂澗霓遊  
魚蓬水上宿鳥向風棲一見桃花發能令秦漢迷

山行

寂歷青山曉山行趣不稀野花成子落江燕引雛飛暗  
草薰苔徑晴楊埽石礫俗人猶語此余亦轉忘歸

陸海餘慶

之孫

題奉國寺

新秋夜何爽露下風轉淒一磬竹林外千燈花塔西

送晁補闕歸日本國

西涼承休澣東隅返故林來稱劍子學歸是越人吟馬  
上秋郊遠舟中曙海陰知君懷魏闕萬里獨搖心

史俊

題巴州光福寺楠木

近郭城南山寺深亭亭奇樹出禪林結根幽壑不知歲  
聳幹摩天凡幾尋翠色晚將嵐氣合月光時有夜猿吟  
經行綠葉望成蓋宴坐黃花長滿襟此木嘗聞生豫章  
今朝獨秀在巴鄉凌霜不肯讓松柏作宇由來稱棟梁  
會待良工時一眄應歸法水作慈航

芮挺章

國子進士

江南弄

春江可憐事最在美人家鸚鵡能言鳥芙蓉巧笑花地  
銜金作埒水抱玉為沙薄晚青絲騎長鞭赴狹斜

少年行

任氣稱張放銜恩在少年玉階朝就日金屋夜昇天軒  
騎青雲際笙歌綠水邊建章明月好留醉伴風煙

樓穎

天寶中進士

伊水門

朝涉伊水門伊水入雲流  
愜心乃成興澹然汎孤舟霏  
微傍青藹容與隨白鷗竹陰交  
前浦柳花媚中洲日落  
陰雲生彌覺茲路幽聊以恣所適  
此外知何求

東郊納涼憶左威衛李錄事收昆季太原崔參

軍

水竹誰家宅幽庭向宛門今知季倫治舊是辟疆園饑  
鷺窺魚靜鳴鶴帶子喧興成祇自適欲白返忘言

納涼每選地近得青門東林與繚垣接池將沁水通枝

交帝女樹橋映美人虹想是忘機者悠悠在興中  
林間求適意池上得清飈稍稍斜回櫲時時一度橋水  
光壁際動山影浪中搖不見李元禮神仙何處要

西施石

西施昔日浣紗津石上青苔思殺人一去姑蘇不復返  
岸傍桃李為誰春

李收

右武衛錄事

和中書侍郎院壁畫雲

粉壁畫雲成如能上太清影從霄漢發光照披垣明映  
篠多幽趣臨軒得野情獨思作霖雨流潤及生靈

幽情

幽人惜春暮潭上折芳草佳期何時還欲寄千里道

薛奇童大理司直

擬古

沙塵朝蔽日失道還相遇寒影波上雲秋聲月前樹川  
氣生曉夕野陰乍煙霧沈沈澁池水人馬不敢度吮癰

世所薄挾續恩難顧不見古時人中宵淚橫注

塞下曲

騎虜初南下煙塵暗國中獨召李將軍夜聞甘泉宮一身許明主萬里總元戎霜甲卧不煖夜半聞邊風胡天早飛雪荒徼多轉蓬寒雲覆水重秋氣連海空金鞍誰家子上馬鳴角弓自是幽并客非論愛立功

和李起居秋夜之作

過庭聞禮日趨侍記言廻獨卧玉窓前卷簾殘雨來高

秋南斗轉涼夜北堂開水影入朱戶螢先生綠苔簡成  
良史筆年是洛陽才莫重白雲意時人許上台

雲中行

雲中小兒吹金管向晚因風一川滿塞北雲高心已悲  
城南木落腸堪斷憶昔魏家都此方涼風觀前朝百王  
千門曉映山川色雙闕遙連日月光舉杯稱壽永相保  
日夕歌鐘徹清昊將軍汗馬百戰場天子射獸五原草  
寂寞金輿去不歸陵上黃塵滿路飛河邊不語傷流水

川上含情歎落暉此時獨立無所見日暮寒風吹客衣

吳聲子夜歌

淨埽黃金階飛霜皎如雪下簾彈箜篌不忍見秋月

閻寬

古意

庭樹發華滋瑤草復葳蕤好鳥飛相從愁人深此時天  
中有靈匹日夕蟬蛾着願逐飄風花千里入遙帷心逝  
愛不見空歌悲莫悲

春宵覽月

月生東荒外天雲收夕陰愛見澄清景象吾虛白心耳  
目靜無譁神超道性深乘興得至樂寓言因永吟

秋懷

下帷長日盡虛館早涼生芳草猶未薦如何蜻蛚鳴秋  
風已振衣客土何時歸為問當途者寧知心有違

梁鍾

七夕汎舟

雲端有靈匹掩映拂妝臺夜久應搖珮天高響不來片  
歡秋始展殘夢曉翻催却怨填河鵠留橋又不迴

觀美人卧

妾家巫峽陽羅帳寢銀牀曉日臨窗久春風引夢長落  
釵仍胃鬢微汗欲銷黃縱使朦朧覺魂猶逐楚王

代征人妻

征夫走馬發漁陽少婦含嬌開洞房千日廢臺還挂鏡  
數年空面再新妝東風喜出今朝戶明月虛眠昨夜牀

莫道幽閨無遠思還衣總是舊時香

省試方士進恒春草

東吳有靈草生彼剡谿傍既亂莓苔色仍連茜茜香掇之稱遠士持以奉明王北闕顏彌彌駐南山壽更長金膏徒騁妙石髓莫矜良儻使霑涓滴還從不死方

張萬頃

東谿待蘇戶曹不至

洛陽城東伊水西千花萬竹使人迷臺上柳枝臨岸低

門前荷葉與橋齊日暮待君君不見長風吹雨過青谿

送裴少府

夕膳望東周晨裝不少留酒中同樂事闊外起離憂座濕秦山雨庭寒渭水秋何當鷹隼擊來拂故林遊

范朝

寧王山池

水勢臨階轉峯形對路開槎從天上得石是海邊來瑞草分叢種祥花間色裁舊傳詞賦客惟見有鄒枚

題石甕寺

勝境宜長望遲春好散愁闊連四塞起河帶八川流複  
磴承香閣重巖映彩樓為臨溫液近偏美聖君遊

屈同仙

燕歌行

漁陽八月塞草腓征人相對併思歸雲和朔氣連天暗  
蓬雜驚沙散野飛是時天地陰埃遍瀚海龍城皆血戰  
兩軍鼓角暗相聞四面旌旗看不見昭君遠嫁已年多

戎狄無厭不復和漢兵候月秋防塞胡騎乘冰夜渡河  
河塞東西萬餘里地與京華不相似燕支山下少春輝  
黃砂碛裏無流水金戈玉劍十年征紅粉青樓多怨情  
厭向殊方久離別秋來愁聽擣衣聲

常非月

西河尉

詠談容娘

舉手整花鉢翻身舞錦筵馬圍行處匝人壓看場圓歌  
索齊聲和情教細語傳不知心大小容得許多憐

郭良金部員外

題李將軍山亭

鳳輶將軍位龍門司隸家衣冠為隱逸山水作繁華徑  
出重林草池搖兩岸花誰知貴公第亭院有煙霞

早行

早行星尚在數里未天明不辨雲林色空聞風水聲月  
從山上落河入斗間橫漸至重門外依稀見洛城

郭向太子尉

途中口號

抱玉三朝楚懷書十上秦年年洛陽陌花鳥弄歸人

張鼎司勲員外

鄴城引

君不見漢家失統三靈變魏武爭雄六龍戰盪海吞江  
制中國迴天運斗應南面隱隱都城紫陌開迢迢分野  
黃星見流年不駐漳河水明月俄終鄴國宴文章猶入  
管絃新帷座空銷孤兔塵可惜望陵歌舞處松風四面

暮愁人

僧舍小池

引出白雲根  
潺潺漲蘚痕  
冷光搖砌錫  
疎影露枝猿淨  
帶凋霜葉香  
通洗葉源貝多  
文字古宜向此中翻

江南遇雨

江天寒意少  
冬半雨仍飛  
出戶愁為聽  
從風灑客衣  
旅魂驚處斷  
鄉信意中微  
幾日應晴去  
孤舟且欲歸

楊諫永樂  
丞

白香山集  
卷四十六  
贈知己

江南折芳草江北贈佳期江濶水復急過江常苦遲  
白蘭葉青恐度先香時美人碧雲外寧見長相思

答長孫十一東山春夜見贈

故人謝城闕揮手碧雲期谿月照隱處松風生興時舊  
林日云暮芳草歲空滋甘與子成夢請君同所思

沈頌無錫  
尉

早發西山

遊子空有懷賞心杳無路前程數千里乘夜連輕馭繚  
繞松篠中蒼茫猶未曙遙聞孤村犬暗指人家去疲馬  
懷澗泉征衣犯霜露喧呼谿鳥驚沙上或騫翥娟娟東  
岑月照曜獨歸慮

送人還吳

人心不忘鄉矧余客已久送君江南去秋醉洛陽酒贈  
言幽徑蘭別思河堤柳征帆暮風急望望空延首

旅次灞亭

閒琴開旅思清夜有愁心圓月正當戶微風猶在林蒼茫孤亭上歷亂多秋音言念待明發東山幽意深

朱斌

登樓

白日依山盡黃河入海流欲窮千里目更上一層樓

沈千運

吳興人

贈史修文

故人阻千里會面非前期握手於此地當歡反成悲念

離宛猶昨俄已二十期疇昔皆少年別來鬢如絲不道  
舊姓名相逢知是誰曩遊盡騫翥與君仍布衣豈曰無  
其才命理應有時別路漸欲少不覺生涕洟

汝墳示弟妹

今日天氣煖東風杏花坼筋力久不如却羨澗中石神  
仙杳難信中壽稀滿百近世多夭傷喜見鬚髮白藜杖  
竹樹間宛宛鶯行跡豈知林園主却是林園客兄弟所  
存半空為亡者惜冥冥無再期哀哀望松栢骨肉能幾

人年大自疎隔性情誰免此與我不相易惟念得爾輩時看慰朝夕平生茲已矣此外盡非適

古歌

北邙不種田但種松與柏松柏未生處留待市朝客

孟雲卿

平昌人

古別離

朝日上高臺離人怨秋早但見萬里天不見萬里道君行本迢遠苦樂良難保宿昔夢同衾憂心常傾倒含酸

欲誰訴展轉傷懷抱結髮年已遲  
征行去何早寒暄有時謝憔悴難再好  
人皆算年壽死者何曾老少壯無見期  
水深風浩浩

今別離

結髮生別離相思復相保如何日已久五變中庭草渺渺  
大海途悠悠吳江島但恐不出門出門無遠道遠道行既難  
家貧衣又單嚴風吹積雪晨起鼻何酸人生各有志豈不懷所安  
分明天上日生死願同歡

古挽歌

草草閭巷喧塗車儼成位冥冥何所須盡我生人意北  
邙路非遠此別終天地臨穴頰撫棺至哀反無淚爾形  
未衰老爾息纔童稚骨肉安可離皇天若容易房帷即  
靈帳庭宇為哀次薤露歌若斯人生盡如寄

傷懷贈故人

稍稍晨鳥翔淅淅草上霜人生早罹苦壽命恐不長二  
十學已成三十名不彰豈無同門友貴賤易中腸驅馬

行萬里悠悠過帝鄉  
幸因絃歌末得上君子堂  
衆樂互喧奏獨子備笙簧  
坐中無知音安得神揚揚  
願因高風起上感白日光

鄴城懷古

朝發淇水南將尋北燕路  
魏家舊城關寥落無人住  
昔天地屯曹公獨中據羣臣  
將北面白日忽西暮三臺竟寂寞  
萬事良難固雄豪安在哉  
衰草沾霜露雀巍長河北尚見應  
劉墓古樹藏龍蛇荒茅伏狐兔  
永懷故池

館數子連章句逸興驅山河雄詞變雲霧我行覩遺跡  
精爽如可遇斗酒將醉君悲風白楊樹

行路難

君不見高山萬仞連蒼旻天長地久成埃塵君不見長  
松百尺多勁節狂風暴雨終摧折古今何世無聖賢吾  
愛伯陽真乃天金堂玉闕朝羣仙拍手東海成桑田海  
中之水慎勿枯鳥鳶啄蚌傷明珠行路難艱險莫踟躕

途中寄友

昔時聞遠路謂是等閒行及到求人地始知為客情事  
將公道背塵遠馬蹄生儻使長如此便堪休去程

寒食

二月江南花滿枝他鄉寒食遠堪悲貧居往往無煙火  
不獨明朝為子推

張彪

賴上人

古別離

別離無遠近事歡情亦悲不聞車輪聲後會將何時去

日忘寄書來日乖前期縱知明當返一息千萬思

雜詩

富貴多勝事貧賤無良圖上德兼濟心中才不如愚商  
者多巧智農者爭膏腴儒生未遇時衣食不自如久與  
故交別他榮我窮居到門懶入門何況千里餘君子有  
褊性況乃尋常徒行行任天地無為強親疎

神仙

神仙可學無百歲名大約天地何茫茫人間半哀樂浮

生亮多感善事翻為惡爭先等驅逐中路苦瘦弱長老  
思養壽後生笑寂寞五穀非長年四氣乃靈藥別子何  
必待吾心滿寥廓

北遊還酬益雲卿

忽忽望前事志願能相乖衣馬日羸弊誰信文與才善  
道居貧賤潔服蒙塵埃行行無定心坎壈難歸來慈母  
憂疾瘳室家念低催與君宿姻親深見中外懷俟余惜  
時節悵望臨高臺

元季川

名融次  
山之弟

古遠行

悠悠遠行者羈獨當時思道與日月長人無第舍期出  
門萬里心誰不傷別離縱遠當白髮歲月悲今時何況  
異形容安須與爾悲

泉上雨後作

風雨蕩煩暑雷息佳霽初衆峰帶雲色秋氣入我廬  
颯涼颯來窺臨愜所圖綠蘿長新蔓裊裊垂坐隅流水

復簷下丹砂發清藥養葛為我衣種芋為我蔬誰是晚  
與畦澑漫連野蕪

登雲中

灌田東山下取樂在爾休清興相引行日日三四周白  
鷗與我心不厭此中遊窮覽頗有適不極趣無幽寥然  
歌采薇曲盡心悠悠

山中晚興

河漢降玄霜昨來節物殊媿無神仙姿豈有陰陽俱靈

鳥望不見慨然悲高梧華葉隨風揚珍條雜榛蕪為君  
寒谷吟歎息知何如

趙徵明

挽歌詞

寒食蒿上明淒淒郭東路素車誰家子丹旐引將去原  
下荆棘叢叢邊有新墓人生痛長別此是長別處曠野  
何蕭條風悲白楊樹

思歸

為別未幾日一日如三秋猶疑望可見日日上高樓惟  
見分手處白蘋滿芳洲寸心寧死別不忍生離憂

回軍跋者

既老又不全始得離邊城一枝假枯木步步向南行去  
時日一百來時月一程常恐道路旁掩棄狐兔塋所願  
死鄉里到日不願生聞此哀怨詞念念不忍聽惜無異  
人術倏忽具爾形

陶峴

淵明之後

西塞下廻舟作

匡廬舊業是誰主吳越新居安此生白髮數莖歸未得  
青山一望計還成鴉翻楓葉夕陽動鷺立蘆花秋水明  
從此捨舟何所詣酒旗歌扇正相迎

孟彥深

字士源天寶初登進士第武昌令

元次山居武昌之樊昌新春大雪以詩問之

江山十日雪雪深江霧濃起來望樊山但見羣玉峰林  
鶯却不語野獸翻有蹤山中應大寒短褐何以完皓氣

凝書帳清著釣魚竿懷君欲進謁谿滑渡舟難

韋建

泊舟盱眙

泊舟淮水次霜降夕流清夜久潮侵岸天寒月近城平  
沙依雁宿候館聽雞鳴鄉國雲霄外誰堪羈旅情

張松齡志和兄

和答弟志和漁父歌

樂在風波釣是閒草堂松徑已勝攀太湖水洞庭山狂

風浪起且須還

張志和字子同  
金華人

漁父歌

釣臺漁父褐為裘兩兩三三舴艋舟能縱棹慣乘流長江白浪不曾憂

霅溪灣裏釣魚翁舴艋船為家西復東江上雪浦邊風笑著荷衣不歎窮

松江蟹舍主人歡菰飯莼羹亦共餐楓葉落荻花乾醉

宿漁舟不覺寒

青草湖中月正圓  
巴陵漁父棹歌連  
釣車子 櫪頭船樂在  
風波不用仙

漁父

八月九月蘆花飛  
南谿老人垂釣歸  
秋山入簾翠滴滴  
野艇倚檻雲依依  
却把漁竿尋小徑  
閒梳鶴髮對斜暉  
翻嫌四皓曾多事  
出為皇儲定是非

獨孤及

字至之  
洛陽人

海上寄蕭立

朔風剪塞草、寒露日夜結。  
行行到瀛壠、歸思生暮節。  
驛樓見萬里、延首望遼碣。  
遠海入大荒、平蕪際窮巒。  
舊國在夢想、故人胡且越。  
契闊阻風期、荏苒成雨別。  
海西望京口、兩地各天末。  
索居動經秋、再笑知曷月。  
日南望中盡、惟見飛鳥滅。  
音塵未易得、何由慰飢渴。

三月三日自京到華陰水亭獨酌寄裴六薛八  
祇役匪遑息、經時客三秦。  
還家問節候、知到上巳辰。  
山

縣何所有高城閉青春和風不吾欺桃李滿四鄰舊友  
適遠別誰當接歡欣呼兒命長瓢獨酌吳湘醇一酌一  
朗詠既酣意亦申言筌斃兩忘霞月祇相新裴子塵表  
物薛侯席上珍寄書二傲吏何日同車茵詎肯挾空名  
終然羈此身他年解桎梏長作海上人

代書寄上裴六冀劉二頴

昔余馬首東君在北海汭盡屏簿領書相與議巖穴載  
來詣佳境每山有車轍長嘯林木動高歌墜壺歟此辭

月未周虜馬嘶絳闕猛虎踞大道九州當中裂闢君棄  
孤城猶自握漢節恥栖惡木影忍與故山別脫鳥挂嶺  
雲固然若鳥逝惟留潺湲水分付練谿月爾來大谷梨  
白花再成雪關梁限天圖歡樂竟兩絕大盜近削平三  
川今底寧白芒布春令屏翳收雷霆伊洛日夜漲鳴皋  
蘭杜青騫騫雨黃鵠何處遊青冥疇昔切玉刀應如新發  
硎及時當樹勲高懸景鐘銘莫抱白雲意裡往丹丘庭  
功成儻長揖然後謀滄溟

客舍月下對酒醉後寄畢四耀

鄉路風雪深生事憂患迫天長波瀾廣高舉無六翮獨  
立寒夜移幽境思彌積霜月照簷淨銀河入簷白沽酒  
聊自勞開樽坐簷隙主人奏絲桐能使高興劇清機暫  
無累獻酢更絡繹慷慨萬天歌懵懵廣陵陌既醉萬事  
遺耳熱心亦適視身兀如泥瞪目傲今昔故人問城闕  
音信兩脉脉別時前盟在寸景莫自擲心與白日鬪十  
無一滿百寫形新火內甘作天地客與物無親疎斗酒

勝竹帛何必用自苦將貽古賢責

下弋陽江舟中代書寄裴侍御

故鄉隔西日去水連長天前路知幾許但指天南邊愴  
恨極浦外隱映青山連東風滿帆來五兩如弓弦遙羨  
繡衣客固然馬首先得餐武昌魚不顧潯陽田屈指數  
別日忽乎成兩年百花已滿眼青草漸碧鮮豈是離居  
時奈何子役牽洞庭有深涉蜀日期歸旋且作異鄉料  
詎知攜手緣離憂未易銷莫道樽酒賢

庚子歲避地至玉山訓韓司馬所贈

滄海疾風起洪波駭恬鱗已無濟川分甘作乘桴人揮  
手謝秣陵舉帆指甌閩安知風塵表偶與瓊瑤親共悲  
行路難况逢江南春故園如在夢返復知何辰曠野豺  
虎滿深山蘭蕙新枉君灞陵什迴首徒酸辛

觀海

北登渤海島廻首秦東門誰尸造物功鑿此天池源湏  
洞吞百谷周流無四垠廓然混茫際望見天地根白日

自中吐扶桑如何捫超遙蓬萊峯想像金臺存秦帝昔  
經此登臨冀飛翻揚旌百神會望日羣山奔徐福竟何  
成羨門徒空言惟見石橋足千年潮水痕

壬辰歲過舊居

少年事遠遊出入燕與秦離居歲周天猶作勞歌人負  
劍渡賴水歸馬自知津緣源到舊廬攬涕尋荒葵鄰里  
喜相勞壺觴展殷勤酒闌擊竹語及此離會因丈夫隨  
世波豈料百年身今日負鄙願多慙故山春

傷春懷歸

誰謂鄉可望  
望在天地涯  
但有時命同  
萬里共歲華  
昨夜南山雨  
殷雷坼萌芽  
源桃不余欺  
先發秦人家  
寂寂戶外掩  
遲遲春日斜  
源桃默無言  
秦人獨長嗟  
不惜中腸苦  
但言會合賒  
思歸吾誰訴  
笑摘南枝花

雨後公超谷北原眺望寄高拾遺

崖口雨足收  
清光洗高天  
虹霓斂殘靄  
山水含碧鮮  
遠空霞破露  
月輪薄雲片  
片成魚鱗  
五陵如薌  
渭如帶目

極千里闊山春朝來夾氣未易說畫取花峰贈遠人

官渡柳歌送李員外承恩往揚州觀省

君不見官渡河兩岸三月楊柳枝千條萬條色色勝  
綠絲花作鉛粉絮葉成翠羽帳此時送遠人悵望春水  
上遠客折楊柳依依兩含情夾郎木蘭舟送郎千里行  
郎把紫泥書東征覲庭闈脫却貉簪榆新著五綵衣雙  
鳳并兩翅將離東南飛五兩得便風幾日到揚州莫貪  
揚州好客行刺淹留郎到官渡頭春蘭已應久殷勤道

遠別為謝大堤柳攀條儻相憶五里一回首明年柳枝  
黃問郎還家否

蓬萊驛夜宴平盧楊判官醉後贈別姚太守置  
河閒宴

驛樓派海壘秋月寒城邊相見自不足況逢主人賢夜  
清酒濃人如玉一斗何啻直十千木蘭為樽金為杯江  
南急管盧女絰齊童如花鮮郢曲起舞激楚歌采蓮固  
知別多相逢少樂極哀至心嬋娟少留莫辭醉前路方

悠然明日分飛儻相憶祇應遙望西南天

和贈遠

憶得去年春風至中庭桃李映瑣窗美人挾瑟對芳樹  
玉顏亭亭與花雙今年新花如舊時去年美人不在茲  
借問離居恨深淺祇應獨有庭花知

和題藤架

陰陰葉成幄璀璨花落架花前離苦心愁至無日夜人  
去藤花千里強藤花無主為誰芳相思歷亂何由盡春

日迢迢如線長

登凌湖亭傷春懷京師故舊

昨日看搖落驚秋方怨咨幾經開口笑復及看花時世事空名束生涯素髮知山山春草滿何處不相思

得李滁州書以玉潭莊見託因書春思以詩答

春物行將老懷君意詎堪朱顏因酒強白髮對花慙日裏思瓊島書中話玉潭知同百口累曷日辦香簪

答李滁州憶玉潭新居見寄

從來招隱地未有剖符人山水能成癖巢夷擬獨親猪  
肝無足累馬首敢辭勤掃灑潭中月他時望德鄰

蕭文學山池宴集

檀樂千畝綠知是辟疆園遠岫當庭戶諸花覆水源主  
人邀盡醉林鳥助狂言莫問愁多少今皆付酒樽

與韓侍御同尋李七舍人不遇題壁留贈

三逕何寂寂主人山上山亭空簷月在水落釣磯閒藥  
院雞犬盡酒壚苔蘚斑知君少機事當待暮雲還

早發龍沮館舟中寄東海徐司倉鄭司戶

沙禽相呼曙色分漁浦鳴榔十里聞正當秋風渡楚水  
况值遠道傷離羣津頭却望後湖岸別處已隔東山雲  
停艤目送北歸翼惜無瑤華持寄君

答李滁州見寄

相逢劇歎別離牽三見江臯蕙草鮮白髮俱生歡未再  
滄洲獨往意何堅愁看郡內花將歇忍過山中月屢圓  
終日望君休汝騎愧無堪報起予篇

同皇甫侍御齋中春望見示之作

望遠思歸心易傷，况將衰鬢偶年光。  
攀芳樹愁花盡，畫掩高齋厭日長。  
敢比流波辭舊浦，忍看新草遍橫塘。  
因君贈我江楓詠，春思于今未易量。

海上懷洛中舊遊寄鄭縣劉少府造渭南王少  
府鑒

涼風臺上山峰月，不夜城邊萬里沙。  
離別莫言關塞遠，夢魂長在子真家。

和虞部韋郎中尋楊駙馬不遇

金屋瓊臺蕭史家暮春三月渭州花到君仙洞不相見  
謂已吹簫乘早霞

冷朝光

越谿怨

越王宮裏如花人越水谿頭采白蘋白蘋未盡人先盡  
誰見江南春復春

衛萬

吳宮怨

君不見吳王宮闕臨江起不卷珠簾見江水曉氣晴來  
雙闕間潮聲夜落千門裏句踐城中非舊春姑蘇臺上  
起黃塵祇今惟有西江月曾照吳王宮裏人

李章

春遊吟

初春遍芳甸十里藹盈矚美人摘新英步步玩春綠所  
思杳何處宛在吳江曲可憐不得共芳菲日暮歸來淚

滿衣

王偃

夜夜曲

北斗星移銀漢低  
班姬愁思鳳城西  
青槐陌上行人絕  
明月樓前鳥夜啼

明君詞

北壁單于日半斜  
明君馬上泣胡沙  
一雙淚滴黃河水  
應得東流入漢家

李暇

擬古東飛伯勞歌

秦王龍劍燕后琴珊瑚寶匣鏤雙心誰家女兒抱香枕  
開衾滅燭願侍寢瓊窓憲半上金縷博輕羅掩面不遮羞  
青綺帷中坐相憶紅鸞鏡裏見愁色簷花照月鶯對棲  
空將可憐暗中啼

怨詩

羅敷初總髻蕙芳正嬌小月落始歸船春眠恒著曉

李澄之

秋庭夜月有懷

遊客三江外，單棲百慮違。  
山川憶處近，形影夢中歸。  
夜月明虛帳，秋風入搗衣。  
從來不慣別，况屬雁南飛。

鄭德元

晚至鄉亭

長亭日已暮，駐馬暫盤桓。  
山川杳不極，徒侶默相看。  
雲夕荆臺暗，風秋郢露寒。  
客心一如此，誰復采芳蘭。

吳象之

陽春歌

簾低曉露濕簾捲鶯聲急欲起把瑩箒如凝管絃澀孤  
眠愁不轉點淚聲相及淨埽階上花風來更吹入

少年行

承恩借獵小平津使氣常遊中貴人一擲千金渾是膽  
家無四壁不知貧

張軫

舟行旦發

夜帆時未發同侶暗相催山曉月初下江鳴潮欲來稍  
分楊子岸不辨越王臺自客水鄉裏舟行知幾迴

劉復

寺居清晨

高枕對曉月衣巾清且涼露華朝未晞滴瀝含虛光隔  
竹聞汲井開扉見焚香幽心感衰病結念依法王青冥  
早雲飛杳靄空鳥翔此情皆有釋悠然知所忘

經禁城

日沒路且長遊子欲涕零荒城無人路秋草飛寒螢東南古丘墟莽蒼馳郊垌黃雲晦斷岸枯井臨崩亭昔人竟何之窮泉獨冥冥蒼苔沒碑版朽骨無精靈俛仰寄世間忽如流波萍金石非汝壽淳生等膘腥不如學神仙服食求丹經

送汪倫

春江日未曛楚客酬送君翩翩孤黃鶴萬里滄洲雲四

方各有志豈得常顧羣山連巴湘遠水與荆吳分清光  
日修阻尺素安可論相思寄夢寐瑤草空氛氲

長相思

長相思在桂林蒼梧山遠瀟湘深秋堂零淚倚金瑟朱  
顏搖落隨光陰長宵嘹唳鴻命侶河漢蒼蒼隔牛女寧  
知一水不可渡況復萬山修且阻繚絲織綺文雙駕昔  
時贈君君可憐何言一去瓶落井流塵歇滅金爐前

蔡文恭

奉和夏日遊山應制

首夏林壑清薄暮煙霞上連巖聳百仞絕澗臨千丈照  
灼晚花鮮滋浸夕流響悠然動睿思息駕尋真賞披彼  
渦川作懷茲洛濱想竊吹等齊竽何用承恩獎

史青

應詔賦得除夜

今歲今宵盡明年明日催寒隨一夜去春逐五更來氣  
色空中改容顏暗裏回風光人不覺已著後園梅

朱琳

開緘怨

夫婿邊庭久幽閨  
恨幾重玉琴知別日  
金鏡識愁容  
寄雲中服慵開海  
上封年年得衣慣  
且試莫裁縫

荆叔

題慈恩塔

漢國山河在秦陵  
草樹深暮雲千里色  
無處不傷心

楊達

塞下

秋日并州路黃榆落故闕孤城吹角罷數騎射鴈還帳  
幕遙臨水牛羊自下山行人正垂淚烽火起雲間

寇泚

度塗山

少年弄文墨不識戎旅難一朝事鞚鼓策馬度塗山塗  
山橫地軸萬里閭荒服悠悠征旆遠騑驂一何速流月  
揮金戈驚風折寒木行聞漢飛將還向臯蘭宿

邢巨

遊春

海岳三峯古春皇二月寒綠潭漁子釣紅樹美人攀弱蔓環沙嶼飛花點石闌谿山遊未厭琴酌弄晴灣

遊琴谿

靈谿非人迹仙意素所秉鱗嶺森翠微澄潭照秋景

李叔卿

江南曲

湖上女江南花無雙越女春浣紗風似箭月如弦少年  
吳兒曉進船鄱家子弟謝家郎烏巾白袷紫香囊菱歌  
思競絕楚舞斷人腸歌舞未終涕雙隕舊宮坡陁絕嶺  
隱西山暮雨過江來北渚春雲沿海盡渡口水流緩妾  
歸宵剩遲含情為君再理曲月華照出澄江時

唐桓

還渭南感舊二首

寢室悲長簞妝樓泣鏡臺獨悲桃李節不共一時開魂

兮若有感  
髮鬢夢中來

常時華室靜笑語度更籌恍惚人事改  
冥漠委荒丘陽原歎薤露陰壑悼藏舟清夜妝臺月空想畫眉愁

贈亡妻張氏

嶧陽桐半死延津劍一沈如何宿昔內空負百年心

君山父老

閑吟

湘中老人讀黃老手援紫藟坐碧草春至不知湖水深

日暮忘却巴陵道

開元名公

裴給事宅白牡丹

長安豪貴惜春殘爭賞新開紫牡丹  
別有玉盤承露冷無人起就月中看

西鄙人

哥舒歌

北斗七星高哥舒夜帶刀至今窺牧馬不敢過臨洮

太上隱者

答人

偶來松樹下高枕石頭眠山中無歷日寒盡不知年

山中客

別酒主人

酒盡君莫沽壺乾我當發城市多囂塵還山弄明月

無名氏

胡笳曲

月明星稀霜滿野  
擅車夜宿陰山下  
漢家自失李將軍  
單于日暮來牧馬

景雲

老僧

日照西山雪老僧  
門始開凍瓶粘柱礎  
宿火臨爐灰童子  
病歸去鹿麌寒入來  
齋鐘知漸近枝鳥下生臺

畫松

畫松一似真松樹  
且待尋思記得無  
曾在天台山上見

石橋南畔第三株

僧雲表

寒食

寒食悲看郭外春  
野田無處不傷神  
平原壘壘傷新塚  
半是去年來哭人

江妃

名采蘋莆田人元宗妃也

謝賜珍珠

桂葉雙眉久不描  
殘妝和淚污紅綃  
長門盡日無梳洗

何必珍珠慰寂寥

宜芬公主

虛池驛題屏風

出嫁辭鄉國由來此別難聖恩愁遠道行路泣相看沙  
塞容顏盡邊鴟粉黛殘妾心何所斷他日望長安

開元宮人

袍中詩

沙場征戍客寒苦若為眠戰袍今手作知落阿誰邊蓄

意多添線含情更著綿今生已過也重結後身緣



石倉歷代詩選卷四十六